

BONERIANO

“
Ta konosé
zumbi na
su pia..
BONERIANO

EDITOR:
Bonaire Communication Services N.V.

Djárason 13 Mart 2024

Preis: \$1.25

CAO GOBIÈRNU TA LANTA INTEROGANTE

Kibrahacha yen di flora



Djis un tiki awa, ya por nota ku palunan di kibrahacha ta yen di flor. Esaki ta notabel na diferente parti di Boneiru, prinsipalmente riba seru.

OIL CHANGES ARE BACK WITH
**Ladies Day
Wednesday**
AT NAPA BONAIRE
[SCHEDULE YOUR SERVICE APPOINTMENT TODAY]
+599 787-6272
NAPA AUTO & TRUCK PARTS

xerox™
OBERSI
ELECTRONICS
BONAIRE

CHANGAN AUTO
C15
/dabboussimotors

LIVE
FM 99

Diplomátikonan Merikano i di Europa a bandoná Haiti

KRALENDIJK/ HAITI -- E ehérsito Merikano a evakuá personal di e embahada Merikano na Haiti pa motibu di violensia di gèn

ku ta tumando lugá den e pais. Gran parti di e área rònt di e embahada ta kontrolá pa gènnan. Asina tambe a pone personal militar na e embahada pa

sigurá e instalashonnan i empleadonan ku ainda tabata presente.

E delegashon di Union Europeo tambe a tuma medida. E ofisina di e delegashon a keda será i e kantidat di empleado a keda redusí na loke ta nesesario. Diplomátikonan Europeo a hui pa e pais bisña Repúblika Dominikana, pa motibu di e situashon di siguridat hopi tenso, un bosero di Ministerio di Relashonnan Eksterior Aleman, a bisa e agensia di notisia DPA.

Sakeo

E violensia di e gènnan

poderoso, ku kier kaba ku e gobièrnu interino di Promé Minister Henry, a paralisá gran parti di e pais. E gènnan ta kontrolá mayoria di e kapital Port au Prince i a invadí e dos prizònnan mas grandi di e pais siman pasá. A liberá mas di 4 mil prizonero. Tambe a hasi sakeo. No ta kla kuantu hende a bira víktima di violensia.

E situashon a intensifiká na fin di luna pasá. Promé Minister, Henry, tabata biaha pa eksterior na e momento ei i no a bolbe.

A e r o p u e r t o internashonal di Haiti ta será i Henry no ta bon biní na Repúblika Dominikana. E pais aki ta hopi preokupá ku violensia i ta klasifiká e

situashon na Haiti komo un menasa direkto pa siguridat i stabilitat.

Henry ta na Puerto Rico awor. El a primintí di tene elekshon nobo na mitar di 2025. Sinembargo, e dos gruponan di gèn prinsipal, ku desde e momento ei a uni, ta eksigí Henry pa bai. Sino lo kuminsá un guera sivil, e lider a atvertí.

E lidernan Karibense a reuní djaluna na Jamaica pa diskutí e situashon. Brasil, Francia i Merka, entre otro tambe tabata invitá. Mientrastantu e haitiano komun ta luchando ku e konsekuensianan di hamber. Nashonnan Uní ta teme ku mas ku 11 mion habitante no tin sufisiente pa kome.



Rijkdienst Caribisch Nederland

VAKATURA

Bo tambe ke traha pa RCN?
Bo por solisitá pa e siguiente funshonnan:

OCW - Kolaboradó di Maneho Senior pa Kultura

OCW - Kolaboradó di Maneho pa Enseñansa i Kultura

OCW - Kolaboradó di Maneho pa Kondishonnan di trabou,
Derechi di Partisipashon di skolnan i Posishon Hurídiko

SSO - Konsehero di Komunikashon

Mas informashon?

Bishitá www.rijksdienstcn.com/vakatura



Pronóstiko di tempu pa Boneiru

Djars 12 te Djáron 13 Mart 2024
Parsialmente te hopi nublá i seku

Ta parsialmente te hopi nublá i seku. E temperatura máximo lo ta aproksimadamente 32°C, e temperatura mínimo mas o ménos 26°C. Bientu for di direkshon ost ta moderá te basta fuerte, forsa 4-5.

Altura di ola: 1.5-2.0 m (5-7 pia), ku lo oumentá djáron te 2.0-2.5 m (6-8 pia)

* Altura di ola válido pa laman grandi

Memorial

Kaya Maria C. Hellmund-Boom 11 • Boneiru • CN
T/F: (+599) 717 3243 (24h) • info@consuelomemorial.com

Esposa, yunan, rumannan i demas famia ta partisipá fayasimentu di nos ser kerí

Sr. Tirzo Thomas Cicilia

mihó konosi komo Titi
***06-07-1969† 09-03-2024**



Akto di entiero ta anunsiá despues.

GRADISIMENTU

Yunan i demas famia di defuntu

Jose Ricardo Mercelina

ta gradisi un i tur ku a mustra atenshon na ora di morto i entiero di nan ser kerí.

Un danki na tur ku a manda flor, hasi yamada telefónico i mensajenan riba media sosial pa boso sosten i fortaleza na nos. Un danki speshal na Consuelo Memorial pa nan bon servisio.

Dios bendishoná boso kada un grandemente.



INVITASHON

Na nómbre di su ruman, ta invitá famia i konosinan na un santu sakrifisio di misa pa deskanso di alma di

Nestor Porfirio Janga

konosi komo Pro

**ku ta tuma lugá,
djaweps 14 mart
pa 7'or anochi na parokia
San Luis Beltran na Rincon.**



Aseptá esaki komo un invitashon personal.

Apesar ámtenar a bai dilanti:

CAO GOBIÈRNU TA LANTA INTEROGANTE

KRALENDIJK - Entidat Públiko Boneiru (EPB) a firma djaluna 11 di mart, kontrato kolektivo (CAO) ku sindikato ABVO. Miéntras partidonan ta selebrá lokual nan ta kategorisá komo logro pa e ámtenar, a subi riba mesa di redakshon di BONERIANO krittika tokante kalkulashon i e omento salarial.

“Tin un diskrepansia drástiko den e kalkulashon di salario. Ta perhudiká spesialmente e klase medio”, segun nos fuente. E ta lanta interrogante basta fuerte konserní kalkulashon di skal di salario.

BONERIANO a aserká diputado Clark Abraham enkargá ku Direktorado Maneho i Sosten, tokante e situashon aki. “Tur hende den aparato gubernamental a bai dilanti. Netamente esunnan den skal di salario mas abou a bai mas dilanti kompará ku esnan den skal mas haltu”, Abraham ta bisa.

No opstante esaki nos fuente ta insistí ku CAO nobo no ta na fabor di tur hende.

Pa presidente di ABVO ta trata aki di kon ta interpretá e kalkulashon i awor djis mester hasi un inventario. “Den tur struktura di salario bo tin diskrepansia. Esei no ta nada nobo i ta normal. Loke mester hasi ta pa pone e krittikanan riba papel i ora nos bin nos ta diskutí nan”, George Hernandez ta bisa.

Adelanto opvio

Abraham ta splika ku den pasado a hasi uso di un porsentahe genérico pa omento di salario. Pues tabata apliká mesun porsentahe pa tur hende lokual tabata kondusí na un hende ku salario haltu outomátikamente ta haña mas omento ku un ámtenar ku ta gana ménos.

“Bo ta haña un kresementu skùin. Aworakí nos a koregí esaki. Netamente esnan ku salario mas abou a

subi den porsentahe mas haltu”, e ta splika. Ku e sistema aki a korigí i ahustá henter e kas salarial di gobièrnu.

Sin embargo nos fuente ta bisa ku aki ta surgi sierto doló pa motibu ku ta krea un situashon inhumano den kua tin diferensia grandi den porsentahe di omento. Sigur ora bo tene kuenta ku subida di ‘trede’.

Abraham ta splika ku na momentu strukturá e subida di ‘trede’ bo ta

haña ku sierto “trede” posiblemente no a subi mesun tantu kompará ku otro. “Pa e grupito aki nos a bin ku un kompensashon separá durante e periodo di CAO aki”, Abraham ta agregá. P’e, e benefisio pa tur ámtenar di EPB ta opvio. Hernandez ta suprayá esaki.

“Tur ámtenar a bai supstansial dilanti na Boneiru. E omento mas abou ta 300 dòler. E trahadó ta bai paga ménos na primanan. E ámtenar

na Boneiru ta akumulá 2.25 na penshun. Esaki ta e máksimo na mundu ku un hende por akumulá na penshun. Trahadónan di EPB ta baha ku un penshun desente, desente, desente”, segun Hernandez. E ta enfatisá ku ta trata di un situashon benefisioso pa e ámtenar i no tin niun motibu pa pánico. “Den tur kos tin ‘kinderziekte’. Si t’asina mes, nos por drech’e tòg?”, Hernandez ta agregá.



Mudansa Ofisina Yudansa pa Víktima

KRALENDIJK -- Entrante djamars 12 di mart te ku djabièrnè 15 di mart e Ofisina Yudansa pa Víktima di Kuerpo Polisial Hulanda Karibense, ta muda pa un edifisio nobo. E adrès nobo ta Kaya Industria 15J, di 2 piso, Seawink Business

Area (dilanti di pòmmp di gasolin di Bonaco).

Durante di e mudansa e Ofisina di Yudansa pa Víktima lo ta alkansabel telefónikamente via 795-1473 òf via meil slachtofferhulp@politiecn.com

OPTENIBEL NA

Kuranderia popular

Natural i spiritual

Un proyekto di Unesco i FuHiKuBo

Ofisina di FuHiKuBo

Ofisina di Extra Del Mar BV

\$17,50

Mensaje de la Virgen Maria Reina de La Paz desde Medjugorje 25 de FEBRERO de 2024

“Queridos hijos, oren y renueven su corazón para que el bien que han sembrado dé frutos de alegría y de unión con Dios. La cizaña se ha apoderado de muchos corazones y se han vuelto estériles. Por eso ustedes, hijitos, sean luz, amor y mis manos extendidas en este mundo que anhela a Dios que es amor. Gracias por haber respondido a mi llamado” **02/25**

POLÍTICA

Miembro di Konseho Insular Roderick Groenman:

“Mi no ta yega kas hubilá despues di konferensia”

KRALENDIJK – “Mi no ta yega kas hubilá, sigur nò,” miembro di Konseho Insular, Roderick Groenman di UPB, a bisa durante e kombersashon di djamars di e delegashon di Boneiru ku e komishon di relashon di Reino di Tweede Kamer, den kua ta wak bèk riba e konferensia di trabou riba e revishon di

WolBES i FinBES. Aunke Groenman tambe a ekspresá su agradesimentu pa e echo ku e islanan durante e konferensia di trabou den tur habrí por a trese tur kos dilanti, enfátikamente el a pone atenshon riba e euforia di e lider di delegashon, Daisy Coffie di M21. “Un kantidat di kos ainda ta den laira.

Nos mester mira ainda kon ta bai elaborá tur kos den detaye,” segun Groenman.

Rolanda Hellburg-Makaai di PDB, Benito Dirksz di UPB i Cyrill Vrolijk di Frakshon Vrolijk, ta mustra riba e esfera positivo durante e konferensia, pero nan tambe ta rekonosé ku no a yena un kantidat di deseo

importante i ku ainda tin un kantidat di final habrí.

Coffie ta tuma e oportunidad pa partisipá na Eerste Kamer su malkontentu ku e i su koleganan sin anunsio delantá, a keda yamá dor di Sekretario di Estado van Huffelen, apart pa un kombersashon tokante e desishon pa oumentá e kompensashon di frakshon ku mas di un mion i mei dòler. “Bon mucha nos a kana

bai huntu i finalmente literalmente a resultá den un kèlder. Mi a duna di konosé ku mi lo a haña mihó ku a mèldu nos un dia adelantá ku e sekretario di estado ku a papia ku nos i ku lo por a sinta den un sala mas nèchi,” segun Coffie.

Djawepsemiembronan di Konseho Insular tin un kombersashon ku porta será ku e komishon di Tweede Kamer di relashon di Reino.

Konsehal Coffie a topa studiantenan na Hulanda

KRALENDIJK – Miembro di Konseho Insular pa M21, Daisy Coffie, a bishitá studiantenan Boneriano na Hulanda.

E konsehal ta orguyoso di kada un di nan, estudiante i profeshonalnan yòn bibá na Hulanda.

Djaluna Coffie tabatin e honor i plaser di kompartí tempu, idea i opinion, ku algun hóben di nos islanan ku ta biba na Hulanda.

Vários tópiko a subi mesa, polítika na nos islanan, 75 dòler di impuesto di entrada, partisipashon di nos hóbennan den toma di desishon pa ku e islanan, trato di studiantenan na Hulanda, kandidatura riba lista político pa elekshon di Union Europeo ku ta un djis aki, votamentu na e islanan pa miembronan di Tweede Kamer, ayudo sosial pa nos hendenan den nesidad na Hulanda, elekshon na

Boneiru na 2027.

Coffie ta skirbi: “Na kada un di boso, danki pa un enkuentro espontáneo hopi great, inspirativo i motivante ku a konfirmá na mi ku e meta pakiko ami a drenta polítika aktivo ta esun bálido i korekto i ku mi no ta luchando en bano, tin speransa, boso ta parti dje speransa ei.

Greenpeace tambe a djòin e enkuentro un ratu.



Oumento kompensashon liber ta keda pa próksimo Gabinete

KRALENDIJK – Sekretario di Estado, Alexandra van Huffelen, ta laga e adaptashon di e kontribushon anual di Reino na Boneiru, Sint Eustatius i Saba, e asina yamá kompensashon liber, na su siguidó.

Esaki a sali na kla for di e planifikashon ku e mandatario a manda Tweede Kamer djamars.

For di investigashon di IdeeVersa, a resultá ku e kontribushon di Reino ku Boneiru ta risibí, ta hopi mas abou pa ehikutá e tareanan insular manera mester ta, esaki ku komo konsekuensia di un kresementu di poblashon fuerte.

Saba i Sint Eustatius, segun e investigadónan, tin sí suficiente na e

liber sí aya konta e hopi kompensashonnan liber huntu.

Momentu ku e rapòrt a sali, van Huffelen a rekonosé ku e kontribushon na Boneiru mester ta hopi mas haltu, pero promé e gabinete mester tuma un punto di bista ofisial. I esaki e gobièrnu aktual no ta bai hasi mas, pasobra e reashon di Gabinete ta pará riba e agènda pa e di kuater kuartal, pues despues di Prinsjesdag.

Ta, mirando e asignatura derechista di un gobièrnu di PVV, NSC, VVD i BBB, pero e pregunta ta sí esun ku ta sigui van Huffelen, ta dispuesto pa para huntu ku islanan BES.



POLÍTICA

Wèspait di notisia Dossier Koninkrijksrelaties

Un sumpiña grandi den wowo di gobièrnu aktual

KRALENDIJK – E wèpsait di notisia ‘Dossier Koninkrijksrelaties’, publiká pa e periodista hulandes René Zwart, ta un sumpiña grandi den wowo di e gobièrnu aktual di Boneiru. E artíkulo i komentarionan fuerte i skèrpi di ‘Dossier Koninkrijksrelaties’ tin e gobièrnu lokal aktual hopi molestiá.

Zwart ta un periodista ku bon bista riba e panorama polítiko antiano

karibense, loke ta resaltá tambe for di su artíkulo i komentarionan. E ta hasi periodismo investigativo, ta buska konfirmashon i komentario tambe pa su artíkulonan.

René Zwart no ta un desconosí den mundu di prensa na Hulanda Karibense i Karibe Hulandes. T’e a kuminsá ku e korant ANTILLIAANS DAGBLAD, ku el a bende despues di

tempu ku Michael Willemse. Dossier Koninkrijksrelaties a nase durante tempu di Covid. René Zwart tokante e korant digital aki: “Komo ku awor tin tiki aktividat pafó di kas i mi no por biaha, pero pa tòg keda okupá, m’a lanta un wèpsait nobo di notisia: Dossier Koninkrijksrelaties. E no ta manera e anterior Koninkrijksrelaties. Nu, pero mas un plataforma di servisio pa tene esnan interesá na altura di kiko ta pasa den e mundu polítiko di Den Haag, kiko ta papia i skirbi riba e relashonnan ku e parti karibense di Reino Hulandes. Mi ta aliviá esaki ku notisia ku mi ta haña i buska den media.”

BONERIANO for di fuentenan ligá ku e gobiernashon aktual a komprondé nan ta sinti nan mes sumamente inkómodo ku e publikashonnan di Dossier Koninkrijksrelaties. E pèn skèrpi di René Zwart

tin nan molestiá i sofoká. “Mi sa ku sigur dos di e diputadonan aktual por bebe sanger di René Zwart. Pero di mes nan no por tuma ningun akshon, pasobra aki ta trata di

libertat di ekspreshon den óptima forma”, un fuente di BONERIANO ku ta hopi yegá na e gobiernashon aktual a konfia. Di mes e no ke pa publiká su nòmber.

Segun Daisy Coffie:

“Mi no ta mira problema pa yega na un griffier nobo”

KRALENDIJK – “Tin varios solisitante pa e puesto di griffier. Mi no ta mira problema pa yega na un griffier nobo”, Daisy Coffie komo presidente di komishon di dunadó di trabou i asuntunan doméstiko ta splika.

Na e momentu aki Arjen De Wolff ta fungi komo griffier interino i entrante aprel 2024 su kontrato ta finalisá. Ya pa algun luna e proseso pa rekrutá un griffier nobo ta den man di e búro eksterno Linkels and Partners.

Mientrastantu a sera e prosedura di solisitut i mirando e kantidat i kalidat di e kandidatonan sigur por yega na un Griffier Insular segun Coffie.

E ta bisa no por deskartá ku ta prolongá e funshon

di De Wolff mirando ku ta e mester guia e griffier nobo den inisio di su tareanan. Últimamente por nota notisia basta negativo i alarmante konserni kondukta di De Wolff.

Djaluna 11 di mart wèpsait di notisia Dossierkoninkrijksrelatie a publiká un artíkulo den kua ta tilda De Wolff di a engańá Konseho Insular di Saba pa 100 mil dòler. BONERIANO a pidi Coffie su reakshon riba e artíkulo aki. “P’ami e wèpsait aki no ta un fuente di notisia òf informashon shen porshento tur ora. Mi ta reservá mi mes di duna un komentario. Sí mi por bisa den e artíkulo tin informashon ku no ta kuadra ku e bèrdat”, Coffie ta bisa.



René Zwart su pèn skèrpi ta un sumpiña den wowo di gobiernashon aktual.

James Kroon pronto den Konseho Insular


KRALENDIJK - BONERIANO ta disponé di informashon ku pronto James Kroon ta drenta den Konseho Insular pa frakshon UPB. Ya pa basta dia tin rumornan persistente tokante postulashon di Kroon komo konsehal. Awor tin tur indikashon

ku esaki ta kristalisá. Di nos fuente verídiko nos a komprondé ku e aktual konsehal Roderick Groenman ta den proseso pa bandoná e puesto aki. “Roderick a solisitá pa un puesto di konsehero den gobièrnu mes. Tur kos ta mustra ku e ta haña e

funshon”, segun nos fuente. Lógikamente Groenman no por kombiná su tareanan komo konsehal, ku su funshon nobo. Mirando ku por trata di konflikto di interes.

Esaki ta enserá ku Groenman ta retirá komo konsehal i Kroon ta asumí e responsabilidad aki. BONERIANO a aserká James Kroon ku a primintí di reakshoná promé ku final di dia.

Te ku publikashon di nos artíkulo Kroon no a konfirmá tampoko desmentí e informashon.



HUSTISIA



Basta but pa violashon den tráfiko

KRALENDIJK -- Entre djaluna 26 di febrüari i djaluna 11 di mart a duna vários but pa violashon den tráfiko durante di kòntrolnan rutinario.

Esakinan tabata lo siguiente:

8x pa manehá sin hèlm bisti;

21x pa manehá sin reibeweis bálido;

16x pa manehá sin seguro bálido;

6x pa tene telefòn den man miéntras ta stür;

21x pa manehá sin faha di seguridat bisti;

2x pa manehá den direkshon prohibí;

1x pa no transportá mucha den stul pa mucha.

KPCN ta hala atenshon di un i tur pa nan tin e dokumentunan nesario manera menshoná akiriba,

na òrdu. Tambe ta konsehá estriktamente pa kumpli ku e reglanan di Lei di Tráfiko.

Ku esaki bo tambe ta kontribuí na un tráfiko seif i sigur riba e isla. E periodo benidero lo bai tene kòntrol regularmente, kaminda lo aktua ku man duru na momentu ku no tin

e dokumentunan menshoná ariba na òrdu i tambe si no ta kumpli ku reglanan di tráfiko.

Bo no ta kumpli ku reglanan? Bo por haña un but.

E suma di un but pa e violashonnan menshoná ta varia entre \$30 te ku \$225.



Korte ta kita outoridat fo'i mama

KRALENDIJK- Hues a disidí na kita outoridat di un mama riba su dos yunan menor di edat i a nombra e mama di kriansa (pleegmoeder) komo e persona ku tin outoridat riba e muchanan. Korte den Promé Instansia a tuma e desishon aki 7 di febrüari

despues ku Voogdijraad a entregá un petishon 15 di novèmber último.

E situashon

Ta trata aki di un mucha di 4 aña ku for di 19 di novèmber 2020 tabata bou di supervishon. Dado momento a sak'e for di kas

di su mama i el a bai biba serka e mama di kriansa. E otro yu di 2 aña ta bou di supervishon promé ku su nasementu i tambe ta biba serka e mama di kriansa. Sinembargo mama a keda ku outoridat riba e yunan. Henter e situashon tin mas ku 3 aña tumando lugá

i mama ainda no ta apto pa tuma responsabilidat di kuido i edukashon di su yunan. Mama no ta kolaborá sufisiente ku Kuido i Hubentut Hulanda Karibense (Jeugdzoorg) i Mental Health Caribbean (MHC).

Voogdijraad a konstatá un situashon alarmante den alrededor di mama. Tin un patronchi di violencia doméstiko, uso di alkohòl, bibienda insigur, abusu

seksual i negligensia ku ainda ta presente den bida di e mama pues no por konfi'e ku outoridat riba e muchanan.

Mama a komprondé esaki i no tabatin niun opheshon pa kita su outoridat i e mama di kriansa tambe tabata dispuesto pa asumí e responsabilidat aki. Voogdijraad a trata na lokalísá e tata biológiko sinembargo esaki no a bin dilanti.



Detenshon pa enkubrimentu

KRALENDIJK -- Riba djabièrnè 8 di mart, alrededor di 11.10 or di mainta, a detené un hòMBER di inisial G.A.R. di 36 aña di edat riba Kaya Nikiboko Sùit pa enkubrimentu.

Un patruya a para e sospechoso pa un kòntrol rutinario i despues di un investigashon a resultá ku e tabata kore riba un skuter hòrtá.

Ta investigando e kaso.

Aksidente entre outo i skuter

KRALENDIJK -- Riba djasabra 9 di mart, alrededor di 5.10 or di atardi, un aksidente entre un outo i un skuter a tuma lugá riba Kaya Korona.

E shofùr di e outo a deklará ku e tabata kore riba Kaya Korona i a lora

na su man robes pa drenta Kaya Esther i diripiente un skuter a dal patras di su vehíkulo.

Pa e motibu aki e shofùr di e skuter a kai.

Ambulans a transportá e shofùr pa hòspital pa tratamentu médiko.

Mondi na kandela

KRALENDIJK -- Alrededor di 2.10 or di mardugá riba djadumingu 10 di mart, 'meldkamer' sentral a risibí notifikashon tokante di un kandela di mondi na Kaya Veronica kaminda kasnan den serkania tabata kore peliger.

Na yegada di e patruya por a konstatá ku e kandela tabata banda di un kas ku no ta abitá i esaki tabata menasá di ekspandé. Durante e kandela, un outo bieu tambe a pega kandela.

Brantwer a paga e kandela. No tabatin herido.

Pikòp a bòltu

KRALENDIJK -- Riba djadumingu 10 di mart, alrededor di 5.25 or di atardi, 'meldkamer' sentral a risibí notifikashon tokante un aksidente riba Kaminda Tra'i Montaña un pikòp a bòltu. Na yegada di e patruya e shofùr tabata sintá banda

di e vehíkulo.

E shofùr a deklará ku e tabata bini for di Rincon, direkshon Playa i a pèrdè kòntrol den un bògt, pa kual motibu e vehíkulo a bòltu. Ambulans a transportá e shofùr pa hòspital pa tratamentu médiko.

Miéntras área Karibense di Reino ta sin barku di patruya

Hulanda ta manda Zr.Ms. Tromp Laman Kòrá

KRALENDIJK/DEN HAAG -- Miéntras área Karibense di Reino ta sin barku di patruya, Hulanda ta manda e barku di marina Zr.Ms. Tromp, Laman Kòrá. E barku lo keda mas òf ménos un luna den Laman Kòrá.

Djadumingu a bira konosí ku e gabinete demisionario ke manda e barku di marina Laman Kòrá i Minister Ollongren a splika esaki djaluna.

E barku mester ta operashonal na fin di e luna akí.

E barku Hulandes di defensa aéreo i komando, mester protehá e barkunan for di atakanan aéreo. Den Laman Kòrá, barkunan ta bou di kandela di e Houthis di Yemen. Houthis ta bisa ku nan ta atakando barkunan ku ta konektá ku Israel.

Zr.Ms. Tromp tin mas o ménos 200 tripulante

na bordo i ta sali djamars pa Mediteráneo. Ademas di e kontribushon den Laman Kòrá, e tripulashon ta hasi otro ehersisio i operashonnan na kaminda.

Ollongren a muestra ku Houthis tin misilnan bastante avansá: “Nan ta usa drone kontra transporte marino tambe. Nos no por laga esei sosodé. I e barku di defensa aéreo akí ta ekipá pa defendé su mes di dje. E esensia ta ku no mester

opstakulisá e paso liber den Laman Kòrá. Esaki ta sumamente importante pa Hulanda i pa resto di mundu.”

Ollongren ta enfatisá ku esaki ta un mishon defensivo i ku e barku lo no tuma medida te ora un atake ta kometé. Zr.Ms. Tromp ta desplegá komo kolaboradó di e mishon di guardia di prosperidat di e operashon liderá pa Merka

i e barku tambe ta sostené e operashon Aspides Europeo. Hulanda tambe a proveé dos oficial di estado mayor pa protehá nan mes kontra Houthis.

Posiblemente Zr.Ms Karel Doorman tambe ta bai den e área. E barku di suministro i sosten akí, por keda usá pa e mishon Europeo Aspides, pero Gabinete ainda no a tuma un desishon tokante esaki.



Josan Bonaire N.V.

ta buska

**-3 metselaar - -1 lasser
-4 timmerman**

- mester tin 2 aña di eksperensia

Pa mas inf. # di telefón **717-7672**

REGOSIHÁ DEN SEÑOR SEMPER

Skritura: Filipensenan 4:1-9

“Regosihá den Señor semper; atrobe lo mi bisa, regosihá! Laga boso kariño ta konosí na tur hende. Señor ta serka.” Filipensenan 4:4-5(BS)

Ban enfoká riba e Skritura di awe. E tin asina tantu bendishon den dje, ku ta yuda nos pasa nos siman ku un mente na pas.

1. Pesei, mi rumannan stimá, ku mi ta anhelá di mira, mi goso i korona, asina anto, mi stimánan, para firme den Señor. 2. Mi ta roga Euodias i mi ta roga Sintike pa nan biba den harmonia ku otro den Señor. 3. Mi ta rogabo tambe, mi kompañero fiel, pa bo yuda e muhénan akí, kendenan a kompartí mi lucha pa kousa di evangelio, huntu ku Clemente tambe, i mi otro kompañeronan, kende nan nòmbernan ta den e buki di bida. 4. Regosihá den Señor semper; atrobe lo mi bisa, regosihá! 5. Laga boso kariño ta konosí na tur hende. Señor ta serka. 6. No preokupá pa nada; ma den tur kos, pa medio di orashon i súplika ku gradisimentu, laga boso petishonnan ta konosí dilanti di Dios. 7. I e pas di Dios, ku ta surpasá tur komprendementu, lo warda boso kurason i boso mente den Cristo Jesus. 8. Finalmente, rumannan, tur loke ta bèrdadero, tur loke ta onorabel, tur loke ta hustu, tur loke ta puru, tur loke ta bunita, tur loke ta di bon fama, si tin algun birtut i si tin algu digno di alabansa, laga esakinan okupá boso mente. 9. E kosnan ku boso a siña i a risibí i a tende i a mira den mi, praktiká e kosnan akí; i e Dios di pas lo ta ku boso.

Bo a lesa trankil? Awor puntra bo mes kiko e versíkulonon akí ta bisa AMI?

Rosa Julia Sintjago-van Arneman
Produksion PGM

Programanan di Bonaire.tv

TELBO kanal 70

Flamingo TV kanal 23

Djárason 13 Mart 2024

12.00 Herensia Aruba:	Marcolina Sonya Martis-Lemminga
13.00 Aki Aruba:	Raymundo Dijkhof
14.00 Herensia:	Martinus Cecilia
15.00 BAPA:	Magasina Di Rei - Arte Boneriano
16.00 Herensia:	Johanes Trinidad
17.00 Aki Statia:	Misa katoliko
18.00 Herensia Korsou:	Servania (Pana) Hart
19.00 BAPA:	Filomeno (Rolly) Sint Jago
20.00 Aktualidat:	Robby Beukenboom
21.00 Aki Sint Maarten:	Duo Velasquez and Friend
22.00 Herensia Korsou:	Plaza Victo
23.00 BAPA:	Wini Poulo

Tur mèrdia 12'or ta kuminsá un programashon nobo di 4 ora.

E programashon aki ta ripití pa 24:00.

PROMÉ MINISTER DI HAITI TA RENUNSIÁ

KRALENDIJK / HAITI -- E promé minister di Haiti, Ariel Henry, a entregá su retiru komo lider di gobernashon di e pais. El a anunsiá esaki despues un konsulta di lidernan di paisnan den region di Caribe ku e minister merikano

enkargá ku Relashonnan di Eksterior Blinken.

Henry a bisa ku e ta bandoná su funshon asina ku tin un konseho di transishon na Haiti i ku a nombra un minister presidente interino. Na final lo mester bini elekshon na

Haiti, esun promé despues di 2016. Segun e presidente di Caricom, Ali, e konseho transitorio a haña mandato pa rápidamente nombra un minister presidente interino.

Durante e konsulta na Jamaica lidernan di diferente pais karibense a

papia tokante e krísis na Haiti. Banda di minister Blinken, tabatin tambe delegashonnan for di Fransia i Brazil. Haiti ta un eks-kolonia franses.

Henry mes no tabata presente na e konsulta. E ta na Puerto Rico, pais na unda el a bai na momentu ku e situashon inkietut a eskalá na Haiti.

Ban pasa dia ku Suny ta pidi sosten

KRALENDIJK -- Bou di e nòmber Ban pasa dia ku Suny, ku ta pará pa un enkuentro stimulantente entre personanan ku i sin deskapasidat intelektual, ta organisá un dia pa personanan di edat ku diferente persona na Kunuku di Sùr Swinda di djaluna pa djabièrnè.

E tempu ku ta invertí ta kompletamente boluntario. Pero mester di sosten di otro tambe pa kumpra algun kos pa nos aktividatnan.

P'esei nos ke pidi un kontribushon na su

kompania. Un kontribushon por yuda hasi posibel pa Pasa dia ku Suny i stimulá kontakto entre personanan ku i sin deskapasidat intelektual.

Tin aktividatnan diario, un biá pa luna un biahe. Ta sirbí kuminda tres biá pa dia. Suny ke pa tur hende di mas ku 60 aña, kibra nan soledat na kas. Aktualmente tin tres konsehero.

Suny ke pidi kualke empresa pa hasi un kontribushon pa apoyá kompra di material promoshonal, transporte,

catering, aktividatnan, awa i elektrisidat. Na promé instansia ta pensa riba catering i transporte. Naturalmente por hasi un proposishon mes tambe. Si ke hasi un kontribushon finansiero, naturalmente esei tambe ta hopi bon biní.

Por hasi un donashon boluntario na MCB Sunythuiszorg 41307606, ku yudansadiekontribushon nos por mustra kon dushi, simpel i importante ta pa personanan ku i sin deskapasidat intelektual konosé otro mihó.

Entrega donashon na Banko di Kuminda

KRALENDIJK -- E kompania di inmóvil MAS Real Estate, a entregá un donashon di 9 mil dòler na Banko di kuminda. E plaka ta kolektá pa e doñonan di e kompania, pa medio di bende kosnan findishi durante un anochi di relashoná ku nan kasamentu.

Na promé instante tabatin algu di konfushon tokante e momento ku

e plaka lo a keda entregá pa MAS Real Estate na un otro bon kousa, ku tambe lo a haña donashon for di e anochi.

Pa e motibu akí, MAS Real Estate a disidí pa duná e montante kompleto na Banko di Kuminda. Banko di kuminda a bisa ku nan por usa e plaka hopi bon.

Nos kier ekspresá nos sinsero gradisimentu na MAS Real Estate, ku a hasi e donashon generoso akí

posibel via un eksitoso akshon di karidat.

E generosidat di MAS Real Estate ta kontribuí na un manera importante na sosten di nos mishon, pa duna yudansa di kuminda na esnan ku mas mester di dje. Nos ta sumamente agradesido pa nan kompromiso i kontribushon na e komunidad di Boneiru, asina Banko di Kuminda Boneiru a bisa.



Banko di Kuminda ta risibí e chèk simbóliko di MAS Real Estate.



Enkargá ku Hustisia i Siguridat

Sekretario Eric van der Burg di bishita na islanan ABC

KRALENDIJK -- den e kadena di Sekretario di estado di Hustisia i Siguridat, Eric van der Burg, ta hiba un bishita di trabou di kuater dia na e parti karibense di Reino. Di 13 te ku 16 di mart e ta bishitá konsekuivamente Aruba, Kòrsou i Boneiru. Den kombersashon ku kolaboradornan i diferente bishita di trabou lo pone e sekretario di estado na altura di e maneho di migrashon, e aserkamentu di trafikashon i kontrabanda di hende i maneho di frontera riba e islanan. Meta di e bishita ta pa keda na altura di e situashon aktual i di e asuntunan di migrashon riba e islanan.

Durante su bishita na Aruba lo diskutí entre otro tokante e posibilidatnan pa promové kolaborashon entre outoridatnan di frontera. Tambe tin kombersashon tokante posibel optimalisashon

den e kadena di imigrashon riba programa i lo diskutí tokante e maneho di imigrashon i kontrol di frontera.

E bishita ta sigui na Kòrsou na unda e sekretario di estado lo hiba kombersashon ku kolaboradornan di IND, lo inform'é tokante e maneho di imigrashon i kon ta atendé ku trafikashon i kontrabanda di hende.

Na Boneiru lo pone e sekretario di estado na altura di e régimen di detenshon di estranhero.

Intenshon di Van der Burg tabata pa a bishitá e islanan anteriormente, pero e mester a kibra su biahe pa motibu di salú.



Kunukero tratando na protehá nan krio

Bòrchi pa no kana ku kachó

KRALENDIJK – Un kunukero ku ta kria kabritu den área di Lagun i Bolivia a disidí di traha algun bòrchi pa logra ku hende no ta bai kana ku nan kachónan den e área aki. Na mas okashon e kachónan aki ta mata

kabritu. Lógikamente no ta trata di bòrchinan ku base legal. Pero en todo kaso e kunukero ke laga komprondé na hendenan ku ta bai kana ku nan kachó ku esaki no ta apresιά. BONERIANO a

komprondé ku tin hende ku ta kana ku nan kachónan na liña, pero otronan ta laga nan kachónan kana lòs, ku komo konsekuensia ku nan ta ataká i asta mata kabritu. Tantu den área di Washikemba komo Lagun tin basta kadaver di kabritu ku posiblemente kachó a ataká.



Despues di petroli awor ta otro fenómeno

Sargasum ta yega kosta atrobe

KRALENDIJK – yega kostanan boneriano Sargasum a kuminsá ta atrobe. Ta un fenómeno ku

a bira kaba un kustumber, pero e mester di atenshon.



E yegada atrobe di sargasum aki ta manifestá despues ku masomé nos dos siman algun mancha di petrolio a yega Boneiru, prosedente di un lancha di petrolio ku a kèntel na Trinidad.

BONERIANO a señalá basta sargasum na kosta pariba di Boneiru djadumingu. Tambe na Lagun. Probablemente tin mas pegá den e bum ku a pone na Lagun en konekshon ku petrolio di e insidente na Trinidad.

Por nota ku e yerba di laman aki último añanan ta yegando na kantidat mas grandi ku ántes. Hopi mas isla i pais den Caribe ta sinti efekto.



Pa probechá di oportunitatnan ekonómiko

Representante spesial Edison Rijna ta yuda islanan BES

KRALENDIJK

Edison Rijna, un kara konosí na Boneiru. E èks gezaghebber mester a duna guia den e temporada ku Boneiru mester a lidia ku e vírus di Corona. Direpente su término di funshon a yega na su final. Rijna a kuminsá mesora ku su ròl nobo komo representante spesial. Den e funshon akí e ta purba di atraé fondo pa Boneiru, Saba i Sint Eustatius. Bonaire. nu a papia ku Rijna ku despues di un aña ta mira resultadonan positivo drenta.

Den e periodo di 2014 te ku 2023, Edison Enrique Rijna, tabata gezaghebber di e isla Boneiru. Den e periodo akí e mester a lidia komo lider ku e vírus di Corona riba e isla. Un periodo desafiante. Na 2020 a prolongá su término di funshon ku seis aña. E periodo akí a terminá abrupto na 2023, ora e lider a anunsiá ku e tin un funshon nobo komo representante spesial. Den e funshon akí e enfoke pa Rijna ta pa buska fondo riba tereno di kambio di klima, konektivitat, siguridat di kuminda, fuentenan di energia duradero i diversifikashon ekonómiko.

For di 1 di aprel, Rijna i su tim ta dirigiendo nan mes por eskrito pa haña fondo pa islanan BES. “Mi por bisa ku nos tin e promé éksitonan”, segun Rijna ku den su promé seis lunanan komo representante spesial tabata skirbiendo un rapòrt general i duna forma na su Gabinete. Hulanda a keda sin uza hopi fondo dentro di Union Europeo. E fondonan akí tabata entre otro destiná pa islanan BES. Pero simplemente no a hasi petishon pa disponé di nan. “Promé ku a apuntá ami komo representante spesial, no tabatin ningun hende ku



tabata atendé ku esaki.” Boneiru ta un munisipio spesial di Hulanda. Pa hopi tin biá ainda no ta kla ku e isla oficialmente no ta miembro di Union Europeo. Sin embargo e isla por apliká sí pa supsidionan Europeo. Estadonan di Union Europeo, Fransia, Hulanda i Dinamarca, tin huntu djestres teritorio ultramar. E islanan ei ta haña fondo pa por ehèmpel kaminda, purifikashon di awa i riol. Ta finansiá esaki for di Union Europeo. Ta parti 550 mion dòler entre e islanan. Mitar di e presupuesto ta bai outomátikamente Groenland, parti di Dinamarca. E sobra di e sèn akí ta destiná pa e otro islanan.

Rijna ta splika: “Fransia ta atendiendo esaki semper bon. Un ministerio spesífiko ta trahando aktivamente pa haña fondo pa e islanan. Di e manera akí e pais a haña ocho biá mas tantu sèn ku Hulanda. Promé ku mi a asumí e funshon komo representante spesial, Hulanda pues mes a hasi tiki.”

Fondonan disponibel

Praktikamente mirá empresa i otro organisashonnan na Boneiru, tin derecho riba un sierto fondo. Bintidos pòchi ku sèn ta destiná pa e organisashonnan akí. Segun Rijna, e organisashonnan akí ku ta na e islanan BES, por tuma kontakto kuné pa

haña sierto finansiamentu. “Laga nos pone ku un empresa ta dirigi su mes riba hortikultura òf riba siguridat di kuminda riba un di e islanan BES. Nan por tuma kontakto ku e punto di kontakto internashonal di Boneiru, Saba, òf St. Eustatius. Ku nan plan i nos ayudo, nan por dirigi nan mes por eskrito pa un fondo na Bruselas. Bo ta pensa aki por ehèmpel riba plannan pa sigui mehorá digitalisashon, kambio di klima, siguridat di kuminda i fuentenan di energia duradero”.

Trinta pa 2030

Union Europeo a establese huntu un meta. Na 2030 mester a baha e efekto di keintamentu global ku 55% kompará ku e nivel di 1990. Union Europeo a skohe islanan BES pa na aña 2030 uza energia completamente duradero. Fondonan pa esaki lo por bira disponibel.

Kuantu, ta dependé di e gastunan. Kompania di Awa i Elektrisidat di Boneiru, WEB, Statia Utility Company N.V. (STUCO) i Saba Electric Company (SEC), a entregá huntu ku e gobièrnun di e islanan i ku sosten di e representante spesial, un proposishon pa bini na remarke pa un fondo. Saba tin energia duradero pa 90%. St. Eustatius pa 80%. Boneiru ta kana atras ku solamente 40%. E añanan benidero Union Europeo ta guia nan pa yega na 100%

durabilidad di e produkshon di energia.

“Pa Boneiru ta un reto grandi pa optené e meta akí. Pa e dos otro islanan, mi ta kere ta mas fásil pa alkansá e meta. Huntu nos a traha un programa, ku a entregá na Union Europeo. A aprobá e programa. Ta e promé éksito ku nos a logra. Kiko bo lo por spera awor. Bateriaan èkstra, panelnan solar, òf mulinanan di bientu, ta ehèmpelnan pa operá kompletamente duradero. Finalmente e kompanianan di koriente riba e diferente islanan mester ehikutá e plan. Finansa ku eventualmente bira disponibel pa esaki, no ta bai pa gobièrnu. E kompanianan ku ta partisipá ta haña esaki. Banda di esei, un gobièrnu no tin e posibilidat pa ehikutá e tipo di plannan akí. Esei un kompania manera WEB por ehèmpel sí tin,” segun Rijna.

Koperashon den Amérika Latino

E representante spesial no a enfoká solamente riba fondonan ku por hasi petishon p’e den Union Europeo. Den su pakete di tarea tin pará tambe pa buska koperashon ku Estádos Unídos. Tambe e ta organisando mishonnan komersial den Amérika Latino.

Segun Rijna, aki konkretamente tin oportunitatnan pa Boneiru: “Tempu ku mi tabata gezaghebber, mi tabata lesa tur ora den korantnan ku un mishon komersial for di Reino Hulandes tabata na kaminda pa Repùblika Dominikana òf Colombia. Loke a yama mi atenshon, tabata ku Boneiru no tabata presente. Esaki a sorprendé mi.” E pakete di tarea di Rijna pues ta variá. Komo representante spesial el a haña e posibilidat pa organisá mishonnan

komersial pa Boneiru.

Atrobe un ròl nobo.

“Mi a haña awor un posishon na Asuntunan Interior, ku ta duná mi posibilidat pa organisá mishonnan komersial.

Pa e motibu ei bo a mirá mi papia na Colombia tokante un konekshon aéreo dirèkt entre Boneiru i Colombia. Tourism Corporation Bonaire, BONHATA i Bonaire International Airport, tabata wak ki posibilidat tin pa haña un komunikashon aéreo entre Boneiru i Colombia. Ora ku nan a tende ku komo representante spesial mi ta permití pa organisá mishonnan komersial, mi a hañá mi enbolbí den esaki. Si mi bai, nan ta risibí nos ofisial. Sino probablemente esaki lo no tabata e kaso,” segun Rijna.

Mas koperashon ku Colombia

No ta e úniko mishon komersial ku Colombia ta kaminda Rijna ta aktivo. Riba petishon di Entidat Públiko Boneiru, e representante spesial ta trahando riba ehekushon di un otro mishon. “Boneiru a hasi petishon di un mishon komersial grandi ku Colombia.

Esei ta pará separá di e buelo dirèkt entre e dos paisnan. Mi ta invitá Saba i St. Eustatius tambe. E di dos mitar di e aña akí, tin un mishon komersial ku e diferente islanan i Colombia ku ami ta bai dirigi.” Tanten Rijna ta komprometé su mes pa e islanan BES. No ta ekskluí ku e islanan Kòrsou, Aruba i Sint Maarten, despues tambe ta bini den e portafolio di e representante spesial. E islanan akí ta skohe ainda pa tanten nan propio kaminda. (Fuente: Bonaire. nu)

Promé resultado positivo kombatimentu malesa di koral

KRALENDIJK --

E promé resultatonan positivo ta notá den e lucha kontra SCTLD. E malesa di koral ta kousa por ehèmpel ku gran parti di koral ta muri i despues bira blanku. STINAPA ta trahando pa kombatí e malesa akí via antibiòtika for di desèmber 2023. Bonaire.nu a tuma e prueba di e kantidat i a buska huntu ku e organisashon di naturalesa.

A nabegá mas o ménos tres kuart ora ku kuater Ranger di STINAPA i kordinadó di SCTLD den un di nan botonan rápido pa Reserva Reina Máxima. E parti akí ta prohibí pa buseo. Sinembargo, STINAPA tambe ke protehá e mundu bou di awa aki. Serka Boka Slagbaai, e organisashon naturalesa a kuminsá proveé antibiòtika na e koralnan malu.

Despues di un seshon informativo, e rangernan a baha na awa. E meta: “Yuda prevení desaparishon di sierto tipo di koral na Boneiru.” Kada Ranger tin sinku spùit grandi ku ta kontené antibiòtika líkido. E remedi ta parse un sorto di pasta suave. E ekipo ta yega na un profundidat máksimo di mas o ménos 20 meter i ta revisá kada pida koral infektá.

Na desèmber 2023, STINAPA a anunsiá ku ya el a kuminsá duna antibiòtika na e refnan di Boneiru. Nan ta hasi esaki pa prevení e brote di SCTLD.

Delany de Obrega, ta yuda tur siman pa preservá e koralnan di Boneiru. E ta den e sistema di rotashon



Tres Ranger di STINAPA ya a baha ku antibiòtika. (Foto: ABC Online Media)

di Ranger ku ta atministrá e antibiòtika den e dos reservanan, ta trata tambe e reserva Rei Willem Alexander. E otro sitionan di buseo lo keda hasí pa boluntarionan den futuro.

E ranger di STINAPA ta mira resultado rápido dor di e uzo di antibiòtika: “Mi ta gusta yuda. Kada bes ku nos bai, mi ta siña di e tratamentunan. Por ehèmpel, mi a siña pone antibiòtika riba koral. Ta interesante. Mi a hasi esaki pa un tempu i mi ta sinti ku e tratamentunan ta funshonando.

Kombatimentu ku hopi ayudo

Dos biá pa siman, e rangernan di STINAPA ta bai e dos reservanan pa monitòr entre 50 i 100 meter pa detektá e aparesementu i reakshon di SCTLD. Sí ta nesesario, un di e profeshonalnan ta disidí sí ta trata e koral, òf nò. Ora e ta disidí di trata e koral, un di e rangernan ta bai serka e koral malu. For di e bòter di spray yen di antibiòtika, e ta saka un kòpi largu. Ku su dede, e ta pone e antibiòtika na e koral malu i saludabel. Despues di e

aplikashon, ta tuma fotonan i posiblemente ta apliká un etikèt pa monitòr e koral na un etapa despues.

Jeannine Toy a keda nombrá komo kordinadó prinsipal di e boluntarionan. For di mart, e ta liderá un grupo di no ménos ku 30 boluntario pa kombatí e malesa di koral na Boneiru.

Toy ta splika kon e proseso ta funshoná: “Na e momentu akí nos ta trata kuater tipo di koral. Nos ta pone e pasta riba e koral malu i saludabel. Asina nos ta stòp e propagashon di e malesa den e pida koral ei. Ku kada parti tratá, nos ta pone un marka.

Ademas, mi ta tuma un potrèt pa nos por sigui e resultatonan den un base di data. Na e momentu akí nos ta hasi dos lugá pa siman. E luna akí nos lo kuminsá ku e boluntarionan. Despues nos ta atendé dies sitio na mes momentu.”

Kritika

Tòg no tur hende ta di akuerdo ku ponementu di antibiòtika den laman. No ta konosí ainda kon bida marino lo reakshoná riba e sustansia. Ademas, ainda no ta konosí e efekto di largu plaso di apliká e método. Sinembargo, Toy ta kere ku atministrá e medisina lo no ta un peliger direkto pa e mundu bou di awa: “Antibiòtika lo no mata piská, den kaso ku nan kome nan aksidentalmente. Ademas, den 24 pa 48 ora, e amoksisilina den e antibiòtika lo deskomponé ku lus solar.

Esaki ta e motibu tambe pakiko nos ta trese

antibiòtika den un kuler chikitu. Pa mayoria di koral, e pasta ku nos apliká lo dispersé atrobe den un siman.”

Amoksisilina ta un di e antibiòtikanan mas usá. Hopi biá ta us’é den animal tambe. Esnan ku ta alérgiko na dje ta tuma esaki solamente prinsipalmente. P’esei e riesgo pa e usuario ta abou.

Resultado positivo

Ta parse ku e partinan di koral tratá ta kura den un tempu kòrtiku. E no por kura realmente. Sinembargo, e ta yuda prevení ku e malesa ta plama ainda mas. Ora ta studia e partinan di koral tratá, ta parse ku no ta forma mancha blanku nobo. E pida koral ta keda bibu i no ta muri mas.

P’esei Toy ta kere ku e tratamentunan ta duna resultado positivo: “Mi ta kere ku 70% di e koralnan

tratá ta keda bibu. Nos no por trata e piesanan morto. Nos por yuda e koral ku ainda ta na bida. Pues trata esaki ta realmente tin sentido.”

E ranger di STINAPA, Arthur Domacassé, tambe ta den awa semanalmente pa protehá e koral. E ranger fuerte ta parse di sa kiko e ta hasiendo bou di awa i ta aktua lihé: “Trata bou di awa pa mi no ta diferente for di kualke otro buseo ku mi lo hasi. Sinembargo, mi mester konsentrá pa wak mi flotabilidad bou di awa. Despues di tur kos, bo no ke hasi daño na otro parti di koral ora mi ta trata algu ku antibiòtika. Kiko mi ta nota asina leu for di e tratamentu. Mi ta mira hopi kambio. Promé, henter e koral duru a muri. Awor mi ta mira bida atrobe. Den hopi kaso e ta funshoná.”

(Fuente: Bonaire.nu)



E antibiòtika ta den di un bòternan di spùit. (Foto: ABC Online Media)



Tambe riba un pida koral kaminda tabatin SCTLD parse ku despues di tratamentu a kura. (Foto: STINAPA)



Un pida koral tratá ku no ta duna síntoma mas di e malesa di koral SCTLD.

The most complete payroll and HR software in the Caribbean!

Payroll Pro HRM

Download the mobile app!

www.payrollprohrm.com

Aktividadat pa 60 plùs

Biblioteca Pùbliko Boneiru ta kontinuá ku su aktividadnan pa 60 plùs. E biá akí e grandinan por a pinta i klùr den un ambiente ameno ku otro.



Boneriano bibá na Aruba

Sonya Lemminga-Martes den Herensia

KRALENDIJK -- Sonya Lemminga-Martes ta den Herensia awe djárason na Bonaire.tv. Ta un dama boneriano bibá alrededor di 50 aña kaba na Aruba, na unda presentadó di Herensia Bòi Antoin a bishit'è den e barío Catiri. A entrevistá tambe su kasá

Ronald Lemminga, kua programa Herensia ta hiba programa lo pasa despues. Sonya den su infansia i hubentut, su profeshon komo maestra di skol, su bida tantu na Boneiru komo Aruba. E programa Herensia aki ta estrená awe djárason pa 12'or di mèrdia na Bonaire.tv, ku riptishon durante tres dia.



Alivio pa kunukeronan

Kámara na kunuku kontra ladron

KRALENDIJK – Un preokupashon di kunukeronan boneriano ta e echo ku ladron ta kibra i hòrta den nan kas òf ranchonan di kunuku. Sinembargo awendia tin teknologia avansá pa protehá bo kunuku kontra ladronisia.

– selular. Tin kompania ku ta instalá e teknologia aki. Por ehèmpel Benjamin Security, ku tin ofertanan sumamente atraktivo pa instalashon di kámaranan di vigilansia na bo kunuku.

Di mes e teknologia aki ta graba tambe posibel ladronnan ku bai kibra pa hòrta den kasnan di kunuku. Te asta den bo bista riba tur moveshon, hasiendo uso di bo telefòn por instalá kámara.





UN JOYA DEN KARIBE!

Biblioteka

Un biblioteka ta un lugá kaminda ta warda buki i hopi otro informashon. Un biblioteka realmente ta tambe un fuente ku ta inkluí buki, revista, kasèt, CD, DVD, manuskrito i mas. Biblioteka ta un fuente di informashon ku ta abarká tur kos.

Un biblioteka ta habrí pa tur hende pa satisfasé nan nesesidat di informashon. Nos ta distinguí biblioteka públiko, di universidat i privá. Nan ta atministrá pa sea gobièrnu, universidat òf pa un fundashon privá. Tur hende por bishitá e bibliotekanan pa amplia nan konosementu i hasi nan investigashon.

Den mi hubentut, no ta poko biaha mi a bishitá nos biblioteka na Johan van Walbeekplein, huntu ku mi amigu di infansia Billy Pandt, kaminda nos a fia bukinan di Karl May (Old Shatterhand), Arendsoog, Pim Pandoer i mas. Nos tabata frekuentá biblioteka públiko i biblioteka di parokia Sta. Ana kasi semanalmente.

Un di e kambionan mas signifkante den biblioteka ta entrada di mundu digital. Ku kresementu di internèt i disponibilitat di material digital, biblioteka mester a adaptá pa keda relevante.



Hopi biblioteka awor ta ofresé aksesu na “database” online, buki elektróniko ku ta permití usuarionan aksesu na informashon i material di lesa for di kualke parti di mundu.

E cambio den mi bishita na bibliotekanan a kuminsá despues ku mi a bai Hulanda pa studia i durante mi estudio, biblioteka a bira mas un lugá kaminda mi ta bai studia òf buska material pa mi estudio, i ménos pa buska buki pa lesa pa mi plaser.

Amor na promé bista

Mas o ménos na 2015 mi a kuminsá hasi investigashon tokante e mundu di sine i teater na Kòrsou. E

aktividat akí a hiba mi na Archivo Nashonal i tambe na Biblioteka Mongui Maduro. Anteriormente mi tabata konosé Biblioteka Mongui Maduro solamente pa nòmber.

Esaki tabata amor na promé bista.

Fundashon Mongui Maduro ta manehá e biblioteka, situá patras di lanthùis Rooi Catootje, den kua bunita muebel antik. E biblioteka ántes tabata den e lanthùis mes, pero despues a traha un bunita edifisio moderno. E edifisio kaminda e biblioteka ta situá ta spesialmente diseñá pa konservá dokumentonan ku kontrol di temperatura i humedat. Fuera di tur esaki, e biblioteka ta ideal pa organisá kualkier konferensia, eksposishon i otro presentashon.

Biblioteka Mongui Maduro tin un kolekshon úniko di publikashon antiano “Antilliana” ku ta artíkulo, buki i tur loke ta skibí i tin di aber ku e 6 islanan, i tambe un kolekshon “Judaica”, ku ta un kolekshon skibí di historia, religion, kultura, kustumber i tradishon i bida hudiu, ku ta data for di siglo XVII.

Buki i dokumentonan ta keda konservá i

katalogá, segurando ku e kolekshon ta salvaguardá pa generashonnan nobo i disponibel pa investigadornan lokal i estranhero. E kolekshon di papel ta konta ku publikashonnan di gran importansia históriko te ku programanan komun, karchinan di invitashon, menú i otro artíkulonnan di tur dia. E kolekshon ta krese konstantemente danki na publikashonnan nobo ku a sali último añanan i danki na donashon di kolekshonnan balioso di Amigunan di Biblioteka Mongui Maduro. Diferente historiadó a deklará ku e biblioteka ” ta manehá aktualmente e kolekshon di dokumento antiano i hudiu mas amplio i kompletu den Karibe hulandes, ku ningun investigador serio di historia i kultura di nos isla por ignorá.”

Meta di e Fundashon ta pa preservá e patrimonio kultural, literario i históriko di Kòrsou pa generashonnan di futuro.

Mongui Maduro

Salomon (“Mongui”) Abraham Levy Maduro a nasé 7 di aprel 1891 i a fayesé 9 di mart 1967. E tabata yu mayó di Ephraim (Fin) Levy Maduro i Serafina Jesurun. Na 1942 Mongui a kasa ku Rachel Louise Pereira Brandao i for di e matrimonio a nase Ena Dankmeijer Maduro.

‘Mongui’ Maduro a kuminsá kolektá publikashonnan tokante Kòrsou na 1905. “Mongui” tabata fasiná ku e aktividat

pa kolektá dokumentonan importante i a siña masha hopi di esaki. Pero hasiendo e trabou akí, el a ripará ku tabata difísil, pa haña mas informashon i konosementu di Kòrsou. Den su tempu no tabatin biblioteka òf no tabatin hende ku tabata kolektá informashon di Kòrsou i di e otro islanan ku ya tabata publiká. I esaki a pone ku “Mongui” a dediká su bida na kolektá informashon di Kòrsou i sobra islanan. Semper tabata su deseo, pa hasi su kolekshon balioso, aksesibel pa públiko. Lamentablemente e mes no a mira realisashon di e proyekto akí. Su yu muhé, Shon Ena Dankmeijer-Maduro a hasi soño di su tata bira realidat. Despues di morto di su tata na 1967, Shon Ena a kontinuá ku konservashon di e kolekshon “Antilliana” i “Judaica”. E kolekshon akí ta algu dinámiko i ta kresiendo dia pa dia. Dia 5 di mart 1974, 50 aña pasá, a lanta e fundashon, ku ta manehá biblioteka Mongui Maduro.

Mi a laga e pida akí te último, pero ku ta un piesa masha importante den e totalidat i dor di esaki mi ta sinti mi kompletamente na kas. Esei ta e echo ku biblioteka Mongui Maduro tin un tim di personal profeshonal, ku ta mantené e kolekshon i ta yuda investigadornan.

No tin ningun mihó kaminda pa pruf un pida di kultura, historia di Kòrsou, ku no ta na Biblioteka Mongui Maduro.





DEN PASO DI BÒI

Awe mi ta kòrtiku i krittiko. No pasobra no tin tópiko pa skirbi ariba. Esei tin semper. Inspirashon tambe t'ei mayoria biá. Pero tin algu ku ta preokupá mi profundamente ku mi ke eksponé den e entrega di awe. Ta bai tokante e forma kon nos bonerianonan ta susha nos isla, tira sushi den mondi, kaba bebe un

serbes, djus òf refresko, pa despues tira e bòter, tantu di glas komo plèstik, tambe bleki òf kartòn, fo'i outo.

Boneiru no ta birando sushi pa falta di Selibon. E ta birando sushi debí na nos mes komportashon i aktitut bergonsoso, esta nos ku ta nasé riba e isla aki, yamando nos mes

boneriano di pura sepa. Tambe mi por mensioná aki latinonan. Mi ta riska bisa esaki, pasobra ta kos ku mi ta mira ku mi mes wowo. Susha Boneiru bai.

Bisa kiko bo ke di makamba, pero por lo general nan no ta kai den e grupo di hende ku ta susha e isla aki. No por laga un òf dos makamba yòn ku ta tira kisas algu for di outo òf den mondi. Pero mayoria grandi ta nos mes hendenan i latino. Semper ora mi ta kana mi investigá bòshinan di sushi den mondi, topando ku por ehèmpel sporan ku ta muestra den direkshon di boneriano i latino. Mi ta skirbi aki loke mi sa.

Siman pasá ei riba un distansia di 400 meter, área di Den Stashi bai nort, m'a topa ku asina tantu bòter di serbes bashí tirá kant'i kaminda ku a haña doló na mi kurason. Kon por ta? Pero só asina i no otro. Bèrgwensa total.



MONCHI & TONCHI

Redakshon di BONERIANO mester ta mas kreativo den nan titularnan.

Awèl sí. Nan mester a pone: GRIFFIER TA DAL SABA CUBA!

KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

<p>Direktor Shirley Martis 785-3824 796-3824</p> <p>Hefe di redakshon Nathaly Evertsz-Ipcendencia</p> <p>Redakshon Papi Antoin Edson Pietersz Ibi Piar (deporte)</p>	<p>Partner na Aruba Awe Mainta</p> <p>Partner na Kòrsou Extra</p> <p>Partner na Boneiru Live99</p> <p>Layout Maya Beaumont</p> <p>Konsehero: Bòi Antoin 786-6818</p> <p>Aviso avisobon@gmail.com</p>
---	--

E koherensia heroiko di e kristian

Pader Fernando Pascual

Tin okashonnan den kua ku ser fiel na Evangelio ta impliká e riesgo di un frakaso den famia, na trabou, den e bida sosial. Kiko hasi e ora ei?

E pregunta ta presentá su mes kontinuamente den kurason di hopi katóliko. Un empresario sa ku e tin ku paga bon salario, pero ku asina e ta perdè kompetividat i ta yega ku su negoshi ta kibra.

Un esposo o un esposa sa kue no mester usa anti-konseptivo, pero e otro banda ta menas' é ku ekspulshon di e hogar o ku divorzio. Un botikario sa ku e no mester bende pastianan ku ta impliká un uso kontrario na e moral katóliko, pero si e no bende nan e lo keda aislá den e merkado i lo terminá den seramentu di su botika. Un distribuidor di buki sa ku no ta korekto faboresé benta di bukinan kontrario na e doktrina katóliko, pero si e aktuá asina ei ta riska su mes na frakaso.

Situashonnan ta infinito. Den nan mes profundidat ta skonde e pregunta inisial: kiko hasi, kon aktua? Has-ta ki punto ta bale la pena



ser fiel na Kristu ora despues un persona por keda bandoná na su suerte, manera un soñadó derotá?

Plantia e kuestion asina ta impliká un eror di perspektiva. Pasobra ku e tipo aki di preguntanan ta parse ku e alternativa ta entre ser fiel na Kristu i ser práktiko i realista. Ku otro palabra, Kristu ta keda poné komo un opstákulo na e "realisashon personal", pasobra un persona ta yega na pensa ku loke Kristu ta pidi lo ta "peligroso": siguié ta impliká dal un salto den bashí ku por hiba na frakaso.

En realidat, esun ku konosé Kristu di bèrdat, esun ku sa loke El a hasi pa e hende mes i pa tur hende, esun ku ta apresia shelu komo e meta outéntiko di

tur eksistensia humano, esun ku ta sinti den su kurason e abraso di misericòrdia, esun ku ta biba fe i speransa den profundidat, no por tin miedu.

Kristu ta, pa esun ku ta kere den serio, lo mas importante. Mas importante ku su puesto di trabou, ku su bida matrimonial, ku su seguridatnan humano, ku su sèn, ku su salú.

Ta fásil bis' é i ta parse masha difisil biba di e manera ei. Pero esun ku ta stima di bèrdat, i nos ta stima di bèrdat ora nos ta sinti nos mes stimá dor di un Dios bon, ta kapas di esaki i di muchu mas.

Mártirnan ta, den e sentido aki, un ehèmpel luminoso: nan ta dispuesto na perdè e propio bida den mannan di perseguidónan asesino promé ku

renunsiá na Kristu. Nan a biba e koherensia heroiko dje kristian.

Bida di tantu mártir, hòmber i muhénan, ta sirbi di lus pa bida di tur esnan batisá. Su testimonio ta konsekuensia di esun ku sa loke nos por lesa den un di e tekstonan mas bunita di esun ku a laga tur kos pa Kristu, Pablo di Tarso:

"Kiko lo por stroba nos di haña e amor ku Kristu tin pa nos? Tribulashon?, angustia?, persekushon?, hamber?, falta di paña?, peligernan?, spada? Manera Skritura ta bisa: 'Pa bo kousa nos ta pasa ansha di morto, dia aden dia afó; Nan ta trata nos manera karné ku nan ta bai mata'. Pero den tur e kosnan aki nos ta mas ku viktorioso pa medio di Esun ku a

stima nos. Pasobra Mi tin sigur ku ni morto ni bida, ni angel ni outoridat, ni kosnan presente ni kosnan futuro, ni forsanan spiritual, ni e lugá di mas haltu ni esun di mas profundo, ni niun otro kos ku Dios a krea, no por separá nos nunca di e amor ku Dios a mustra nos den persona di Kristu Hesus nos Señor" (Rm 8, 35-39).

Despues di dos mil aña, nos por bisa, for di un eksperiensia ku ta salba, ku ni belasting, ni menasanan, ni wèlga, ni e ideanan dominante ta suficiente pa laga nos apartá nos mes for di esun kende a duna nos su Kurpa i su Sanger pa salba nos, kende ta invitá nos na ser, pa semper, su amigunan.

Herarkia di Iglesia Katóliko den órden: arsobispu, obispu, saserdote, diákono, laiko i esnan konsagrá.

Hesus a San Pedro "Kuida mi karnénan, duna mi lamchinan di kome" (San Huan 21): e lamchinan ta e pueblo, e karnénan ta e obispunan, i San Pedro representá tur e Sumo Pontífisenan ku a bai na remplas' é, ta p'esei **Papa tin e outoridat máksimo den Iglesia Katóliko**

Papa tin e privilegio espesial di ta **infalibel**, o sea nunca ta kiboká su mes ora e ta papia tokante dógma i moral, ora e ta siña Iglesia i ora e ta definí algun bèrdat di e doktrina kristian den forma solèm, ya ku semper e ta asistí dor di Spiritu Santu.

Konsilio Vatikano I definí na aña 1870 ku ta dógma di fe ku Papa ora e ta papia di forma solèm pa hinter Iglesia ta infalibel, o sea ku e no por kiboká su mes.

Santa Iglesia Katóliko ta konformá di laiko i klero. Basando su mes den e gradonan ku e Sakramentu di órden ta otorgá, kier men Episkopado, Presbiterado i Diakonado, **Iglesia ta organisá den un herarkia asendente** kaminda e kargo inferior ta esun di e diákono i esun superior, e kargo supremo, Papa

Di e moda aki nos ta topa ku e siguiente herarkianan

- **Kardinal**: konsehero i kolaborador di Papa, ademas di enkargá su mes di skohé
- **Arsobispu primado**: arsobispu de la kapital de un pais.
- **Arsobispu**: bispou de una siudat grandi.
- **Obispu**: susesor legítimo di e Apòstelnan ku ta obedesé Papa, ku ta siña, ta goberná i santifiká fielnan di e diósesis den kua e ta aktua.
- **Saserdote o presbítero**: ministranan sagrado ku ta administrá e sakramentunan, proklamá e palabra di Dios
- **Diákono**: asistente di e presbítero i obispunan. E ta poseé e promé grado di e sakramentu di órden i ta na servisio di karidat, pa proklamashon e Palabra di Dios i di liturgia.
- **Laiko**: ta tur fiel, eksepto miembronan di e órden sagrado i di e estado religioso rekonosé den Iglesia.
- **Esnan konsagrá**: ta laiko òf klérigo, ku frekuensia ta agrupá den órdenan religioso òf den institutonan sekular, aunke nan por biba di moda aislá òf hasta den komunitat habrí, huntu ku otro laikonan no konsagrá.

Otro términonan relashoná ta:

- **Diósesis**: ta e region goberná pa un obispu.
- **Arsobispado**: ta un grupo di diósesis.
- **Konsilio**: ta e reunion di obispu di mundu pa trata kuestionnan di fe i moral.
- **Konferensia episkopal**: ta e reunion di obispunan di un nashon

RETIRO DI KUARESMA

for di dia 13 di Mart te ku 15 di Mart

6:30 PM

ENTRADA GRATUITA

Partisipantenan
 Br. Kyle Dardaine (CTC Trinidad)
 Shakira Franklin (CTC Barbados)
 Matthew Hall
 SR. HALMAN
 REV. JOSE LUIS

PAROKIA SANTA FAMILIA

ARUBA

DOW a actua rapidamente pa atende awa sushi dilanti hotel

ORANJESTAD -- E problema di awa sushi dilanti di hotelnan, ta sigui bira algo delicado y serio



y departamento di DOW a manda un comunicado mustrand cu e biaha aki, nan a ser informa cu tin acumulacion di awa sushi dilanti di Divi Aruba All Inclusive. Mesora e departamento concerni a drenta accion y a bay mira kico ta pasando y kico por wordo haci cu e situacion aki, cual no tabata algo agradabel ni pa huespednan den e hotel of pa otro hendenan pasando den bisindario.

Oficialnan di DOW a constata cu loke nan ta yama 'mes patroon' di e 'pompemaal' di Costa Linda a kima cu consecuencia cu e awa a acumula na e sitio ya no por a sigui pomp esaki pa a bay e destino cu mester a bay.


Personal di DOW a instala un pomp di diesel temporal cu a permiti tecniconan di e

departamento bay over na cambia e patroon dañá mesora y esaki a ser logra den periodo cortico di tres ora y mesora a inicia e proceso pa bay over na chupa e cantidad di awa cu a keda para dilanti di e

hotel.

Na mes momento DOW a mustra cu den proximo dianan, nan lo bay over na cambia tur e mes 'patroonnan' di tur e 'pompemaal' cu tin pa asina evita cu e situacion

aki lo bolbe presenta y crea incomodidad den e areanan hotelero. E departamento di 'Beheer Waterschappen' a percura pa asina por a atende e problema y haya un solucion den corto tempo.



Elite di Venezuela ta busca refugio na Aruba

ORANJESTAD -- E beachnan ideal di Aruba conoci pa nan beyesa puro y hotelnan luhoso, no ta solamente un destinacion pa turista, pero tambe ta atrae e elite economico di Venezuela. Mientras e atencion tabata hopi biaha riba e fluho di migrante laboral di Venezuela cu ta scapa e crisis humanitario den nan pais, awo tin un tendencia nobo: e yegada di inversionista rico di Venezuela, algun di cual supuestamente tin conexion cu e regimen di Maduro.

E inversionistanan aki ta cumpra propiedad cu ta adecua p'e mercado lucrativo di Airbnb, ta adkiri apartamento y ta establece negoshi. Aunke e actividadnan aki riba su mes no ta ilegal, tin preocupacion tocante e tratamiento preferencial cu e personanan aki ta aparece di ricibi compara cu otro

migrante Venezolano.

E desigualdad aki ta kibra e cuestionnan etico pa Aruba. Di un banda, e isla ta beneficia di e entrada di capital, sin importa di unda e ta procede. Na otro banda, tin hende cu ta argumenta cu e aceptacion abiertamente di inversionista cu posibel conexion cu un regimen autoritario, mientras cu ta critica e regimen di Maduro na mes momento, ta refleha hipocresia den e politica di Aruba. E fenomeno di "Los Enchufados" ta referi na Venezuela na esunnan cu segun ta indica a enrikece nan mes door di conexion cercano cu e poder gobernante. Aunke no tin prueba cu tur inversionista rico di Venezuela na Aruba ta satisface e descripcion aki, e posibel presencia di fuente di capital dudoso ta agrega un otro nivel di complejidad n'e situacion aki.

Reconocimento pa ex-burgemeester Kompier di Venray

ORANJESTAD / DEN HAAG – Durante un ceremonia special na Gabinete di Aruba, ex

burgemeester di Venray Leontien Kompier a ricibi un reconocimiento di Gabinete di Minister

Plenipotenciario di Aruba. N'e ocasion aki a nombra señora Kompier como "Loyal Amity Envoy".

Minister Plenipotenciario mr. Ady Thijsen hunto cu Prome Minister mr. Evelyn Wever-Croes a haci entrega di un escultura di glas den forma di un Watapana como simbolo di e reconocimiento aki.

E reconocimiento aki ta pa señora Kompier su sosten incondicional na Aruba y tambe su sentimento caluroso pa nos pais.



KÒRSOU

Mihó ekipá pa hasi uso di fondonan disponibel

WILLEMSTAD -- total di shete partisipante Djaweps 7 di mart un a risibí nan sertifikado



pa a kompletá e training 'Introduction to grant seeking fundamentals', ku éksito, for di man di Minister di Desaroyo Ekonómiko, Ruisandro Cijntje.

Durante kuater seshon, e partisipantenan a enfoká riba maneranan ku nan por krea un strategia pa apliká pa fondonan disponibel pa nan proyektonan. Partisipantenan a haña informashon kon pa identifiká i investigá posibilidatnan di fondo

i finansiamentu, análisis di nan nesidatnan i planeamentu di nan proyekto i mas ku klaro introdukshon na skirbimentu di un petishon pa fondo.

E training 'Introduction to grant seeking fundamentals', ta organisá pa EU-Desk Curaçao, ku ta un departamento bou di Ministerio di Desaroyo Ekonómiko (MEO), den kolaborashon ku Curaçao Institute for Technology and Innovation (CITI).

ku e EU-Desk Curaçao i CITI ta organisá e training 'Introduction to grant seeking fundamentals' ku éksito.

EU-Desk Curaçao i CITI ta organisá e tipo di seshonnan akí, mirando ku tin hopi fondo, prinsipalmente di Union Europeo, ku pueblo tin derecho riba dje.

Tin naturalmente e fondonan di desaroyo di Union Europeo ku ta bai via Gobièrnu, pero aparte di esakinan tin miónes di otro tipo di fondo ku organisashonnan na Kòrsou por apliká dirèkt serka Union Europeo.

EU-Desk Curaçao a tuma nota ku, apesarku tin hopi posibilidat di fondo disponibel, e organisashonnan lokal no ta hasi uso di nan efektivamente prinsipalmente pa falta di e konosementu kon pa apliká.

E training 'Introduction to grant seeking fundamentals' ta yuda eliminá e barera akí i ta alsa e kantidat i kalidat di aplikashonnan pa fondo for di organisashon i empresanan lokal.

Ta e intenshon ku durante e aña akí, EU-Desk Curaçao, huntu ku CITI, sigui ofresé e training 'Introduction to grant seeking fundamentals' di moda ku mas organisashon i empresa lokal por haña e oportunitat pa partisipá. Di e forma akí, ta yuda brinda kapasitashon kada bes na mas persona pa yega na fondonan tantu for di Union Europeo, komo otro fondonan disponibel.

Duck Donuts a habri oficialmente

WILLEMSTAD -- Djabièrnè 8 di mart, Duck Donuts a habri su portanan oficialmente na Curaçao International Airport, pafó riba Airport Boulevard.

E ta habrí tur dia di 9'or di mainta pa 9'or di anochi.

Duck Donuts ta parti di un frankisia Merikano

i esaki ta e promé tienda den Karibe. Lokual ta hasi Duck Donuts úniko, ta ku nan ta trahá fresku na e momento ku hasi pedido i nan ta sirbí kayente.

Ademas, e kliente mes por skohe kua sabor e ta deseá riba su donutnan, òf e por skohe un di e tantísimo sabornan riba e menú.

Algu diferente tambe ta ku Duck Donuts ta ofresé donutnan estilo desayuno, esta ku webu, keshi, spèki, ets. aden. Pa pone e chèri riba e bolo, hendenan lokal ta risibí un deskuento ora nan mustra nan sédula bálido.

Proprietario Willem-Jan Paardekoper, a bisa tambe ku e ta planeá pa habri un di dos filial na Kòrsou, probablemente den área di Punda i Otrabanda.



Tene nos playanan limpi

èxtra
...number 1

www.extraboneiru.com

STATIA/SABA/ST. MAARTEN

Kaluroso bon biní na Gezaghheber nobo

ORANJESTAD (EUX) -- E Gezaghheber nombrá, Alida Francis, a risibí un bon biní alegre ora el a yega kas djaluna nochi for di Hulanda, kaminda el a uni ku un delegashon di Statiano, ku a presentá e posishon di Statia riba e revishon di e lei di Entidatnan Públiko BES.

Famia, amigunan i simpatisadónan, huntu ku e

vise komisario di Gobièrnu, Nicoline van der Linden, a risibí e gezaghheber nobo na aeropuerto ku flor, brasa i mensahe di felisitashon.

E vise komisario di Gobièrnu, huntu ku e reina infantil di Statia, Nayema Schmidt i Shandresha Turner, sobrina i nieta di e futuro Gezaghheber, a risibié riba pista i kada un di e dos hóbennan a

dun'é un rama di flor. Gabinete a anunsiá djabièrnè ku Alexandra van Huffelen, Sekretario di Estado di relashon di Reino i digitalisashon, a manda e nominashon di Francis komo próksimo Gezaghheber na Konseho di Minister. Despues di su nombramentu, Francis ta e promé muhé ku ta asumí e funshon akí.



Produktionan di karni produsí lokalmente

THE BOTTOM -- LinkedIn. Na Saba, Martin Hovius, ta orguyoso di logronan resien pa loke ta trata produkshon lokal di karni na Saba.

“Nos tin dos luna okupá, pero ku orguyo apropiá, mi por informá ku produkshon lokal di karni di kabritu a kuminsá na Saba. Ku yudansa di hopi boluntario, yagdó lokal i guia, nos a logra pone e matadero den funshon, ku ta keda aki pa algun tempu i krea un fluho di kabritu pa e matadero,” Hovius ta skirbi riba su página di

Segun e veterinario lokal, ku ayudo di Herman Terweele, un karnisero di Hulanda, tres persona lokal a risibí entrenamentu pa prosesá karni den vários produkto ku ta bende eksitosamente riba e merkado lokal pa vários siman.

Segun Hovius, e hamburger Saba, e sosèshinan Marquez i vários otro produkto di karni nunca ántes produsí, ta habriendo kaminda entre e poblashon lokal i e restaurantnan.



WINAIR ta kuminsá buelo direkto pa Martinique

PHILIPSBURG -- Despues ku resientemente e kompania di aviashon, WINAIR, a anunsiá di reanudá buelo entre St. Maarten i Nevis, awor aki a anunsiá un ekspanshon di ruta, ku buelonan direkto pa e isla di Martinique.

Kuminsando 1 di aprel, e buelonan lo konektá Martinique direkto ku St.

Maarten i Dominica i vise vèrsa.

Biaheronan for di Martinique por konektá pa hopi destinashon ku un parada na Aeropuerto Prensès Juliana di St. Maarten, manera Sint-Barts, Antigua, St. Kitts, e Islanan Virgen Britániko i hopi destinashonnan na Estádos Unídos i Canada.

“Nos ta hopi kontentu ku nos ta habri un rutan nobo ku ta importante pa e habitantenan di e parti franses di St. Maarten i St. Barts. Di e forma akí, nos ta konektá tres destinashon Franses sin interupshon i ku komodidat ku nos avionnan moderno ATR,” direktor di WINAIR, Hans van de Velde, a bisa.

DEPORTE

Resultado vòlibòl fin di siman

KRALENDIJK--Fin di siman pasá BoVoBo tabatin enkuentronan di Beachvolly I di sala, pa ta mas eksakto djasabra último.

Aki ta sigui e resultadonan ku nos a logra risibí di e federashon di vòlibòl di nos isla.

MPB vs Body and Bario 2-0 pa MPB, esaki ku sètnan di 21-11 i 21-11.

Power Puff Girls vs Pink Pow 2-1 ku sètnan di 21-12, 23-25 i 15-13.

FMD vs UPB1-2 ku sètnan di 18-21, 21-10 i 10-15.

3x30 vs O'girls 2-0 ku

sètnan di 21-16 i 21-8.

Resultado vòli di sala djasabra.

Let's move vs FMD 2-1 ku sètnan di 25-15, 15-25 i 15-7.

Falcons vs Phenix 2-0 ku sètnan di 25-5 i 25-14.

Riba potrètnan algun bista di e partidonan.



Kontinuashon weganan eskolar interinsular

Despues di Aruba, mitar di sinku di atardi i e weganan eskolar interinsular ta kontinuá e fin di siman akí na Boneiru. INDEBON ta presentá e atletanan ku ta bai representá Boneiru den e deporte di futbòl na e weganan interinsular na Boneiru, e tim kampion di futbòl Jong Bonaire. E weganan di futbòl ta tuma lugá 15 di mart di 2'or pa



JAYDI SUSANA



SHARDALY WINKLAR



ROQIËNE DOMACASSÉ



ROSE SHANTELY ENGELHART



GENISHA PIAR CORNELIA



SHAIMARIS MERCERA



XAQUENNE SARAGOZA



SAMANTHA MOLINA



VURY-ANN VISERS

Selekshon futbòl ku partido amistoso na Merka

KRALENDIJK--Nos selekshon di futbòl di Boneiru dia 18 di mart 2024, ta topa ku La Selecta SLV na USA Merka.

Nos selekshon ta kla preparando pa e kompromiso aki.

Nos tin e lista di hungadó di nos selekshon ku lo representá nos isla den e partido amistoso aki aya a Merka.

Selekshon.

Deyon Martijn.

Sifmar Sint Jago.
Gio Renys Felicia.
Fabio Hierck.
Freadyen Michiel.
Rowendly Martilia.
Denyor Cicilia.
Quincy Hoeve.
Rigolino Stakenborg.
Adri Serberie.
Ralley Martijn.
Jurneth Clara.
Ginel Ronde.
Jert van der Sande.
Zacaria Lopes.
Marshelon Pourier.
Rogyaer Michiel.
Tymothy Muller.

Berry Sonnenschein.
Dangemir Cicilia.
Jonathan Libania.

Head Coach:
Rilove Janga.

Staff:
Fitzgerald Cicilia.
Nafthaly Rier.
Rick Van Der Mast.
Pedro Rodriguez.
Coen Freriks.

Esaki nos selekshon di futbòl ku lo hunga kontra Salvador na Merka.

201 MI FAMIANAN

Pa: Bòi Antoin

Mi tin hopi famia. Hopi di nan no sa mes ku nos ta famia. Den e seri aki riba djárason den BONERIANO mi ta skirbi di nan, tantu famianan di parti mi tata komo mama.


Myrena Sint Jago

Myrena ta un di mi hopi prima- i primunan di parti mama, desendentenan di Jules Hellmund i Margaritha Ilario. Di parti tata ta solamente ún prima mi tabatin, Seferina, ku a muri basta aña pasá kaba.

Myrena ta yu di mi tanta Julieta Liberata Sint Jago-Ilario, kasá ku Jos Sint Jago di Rincon. Nan a biba na Kòrsou, promé den Pietermaai, despues den e bario Maripampoen. Ei m'a konosé Myrena su hopi rumannan, manera Sonia, Erwin, Nilka, Tudela, Esther, Marvis, Greta, Wilson i Junnes. Spera ku mi a mensioná tur.

Sirkunstansianan a pone ku Myrena, komo úniko di nan tur, a nase na Boneiru. El a pasa tambe su promé lunanan di bida na e kas Vila Rosa di nos wela Margaritha (Ma Gaita). Mi mama tabata madrina di Myrena.

Myrena a bira un artista di baile. El a move pa New York, na unda ketu bai e ta bibando huntu ku su esposo. Awendia e ta un dosente sertifiká di yoga, meditashon i baile. Desde 1996 Myrena ta dunando lès di Hatha Yoga.



\$249 3-Piece
Patio Set



Leisure Chair
\$235



Visit our second
floor and see
our beautiful
patio furniture.



Teak Coffee Table
\$195

Sun Lounger

\$249



Woven
Dining Set
\$325